

22) *A NEV Y TEUTH*

A nev y teuth
an Fleghik sans
dell veu profuzys seulabryz;
ow kyrghes heudh,
ow toz war-nans
genen dhe driga tamm y'n byz;
an Ger gwryz kig, ha leun a ras,
a dheuth dhe'n nor diworth an Taz,
an flogh somper,
an Selwyas ker,
babynn a dheuth ha boz dremaz.

Bugeledh vaz
yn nosweyth dhown,
ow kwitha deves y'ga gwel,
a wolow bras
y kavsons own,
mes skon y klewsons ger an el:
"Re bo dhe duz bolonjedh da
ha kres y'n norvys maga ta".
Diworth an vre
war-tu ha'n dre,
Bethlem a hedhsons i toeth ta.

D'worth aga bro
an tri den fur
deuvons a'n duryen peub gans ro
dhe ri dhe flogh
an vaghteth pur
neb a's kemmeras y'ga thro.
A'n rohow tri pyth yw an styr?
Rag ankow tynn y sev an myrr,
an owr rag ruw,
an enkys, Duw;
bewnans a Grist nynz ova hir.

Devedhys den,
yn agan ken
byzi y hwrug menystrans berr;
hwath yo'nk y oez
y skoellyas goez,
merwis y'n Grows an Selwyas ker.
Hag ass o bras an sakrifis
a wrug ragon, orth pana bris!
Ha der y drygh
war vernans, pegh,
y'n gwyllyn byw yn Paradhis.

- Composed in Cornish by Ken George, Christmas 2018
- Tune: "In Christ alone"